

Pablo Colosacjārārē ojāca pūrī ni'i

A'ti pūrī a'tiro weero ojano'pā nise ni'i

Pablo Colosa, Frigia di'tapɥ nirī macācjārārē ojacɥ niwī. Cũ ne ni'cāti na tiropure wa'aticɥ niwī. Cũ me'rācjārā Jesucristo ye quetire were, cūrē ějōpeori curuacjārā sājācā weecārā niwā. Ti curua Colosacjārārē Epafras Jesucristo ye quetire bu'e, narē sɥ'ori nisetiɥ niwī.

A'ti pūrīrē Pablo bu'iri da'reri wi'ipɥ nígũ, ojacɥ niwī.

A'tere ojacɥ niwī. Na añurō weesere tɥ'ogɥ, Ō'acūrē e'catise o'osere ojacɥ niwī. Tojo nicā mejēcā bu'eri masārē tɥ'omasīña nisere ojacɥ niwī. Apeyere, Jesucristo yere mɥsā tɥ'o'caronojōta queoro weeya nisere ojacɥ niwī.

Pablo Colosacjārā Jesucristore ějōpeorārē oja'que ni'i

¹ Yɥ'ɥ marī acaweregɥ Timoteo me'rā mɥsārē añuduti'i. Ō'acũ ɥa'caronojōta yɥ'ure Jesucristo cũ ye quetire weredutigɥ cūwī.

² Mɥsā Colosacjārā Jesucristo yarā cūrē ějōpeonu'cūrārē oja'a. Mɥsārē Ō'acũ marī pacɥ añurō weeato. Ejerisājācā weeato.

Pablo Colosacjārārē Ō'acūrē sērībosa'que ni'i

³ Ō'acũ marī wiogɥ Jesucristo pacure mɥsārē sērībosasetirinɥcũ e'catise o'o'o.

4-5 Mũsã ye quetire tũ'owũ. A'tiro ni'i. Mũsã Jesucristo masãrẽ yũ'ruomi nise diacjũ cjasere tũ'ocãrã niwũ. Tere tũ'orã, mũsãrẽ Õ'acũ Ƴ'mũsepũ weeatjere e'catiyutojacãrã niwũ. Tojo weerã Jesucristore añurõ ẽjõpeocãrã niwũ. Mũsã basu Õ'acũ yarã nipe'tirãrẽ añurõ ma'iseticãrã niwũ. Ƴsã tere tũ'o'cãrã nitjãrã, Õ'acũrẽ e'catise o'o'o.

6 Ƴpẽrã quẽ'rã tojota te quetire tũ'orã, mũsã weronojõta weerã weema. Nipe'tiropũ wereturi-awã'cãrã weema. Mũsã Õ'acũ masãrẽ ma'isere tũ'orã, "Diacjũta ni'i", nicãrã niwũ.

7 Ƴsã Ƴpũtu ma'igũ Epafra mũsãrẽ te quetire werecu niwĩ. Cũ Ƴsãrẽ da'ratamugũ nimi. Õ'acũ bese'cu Cristo ye cjasere mũsãrẽ weregu nimi.

8 Cũta mũsã ye quetire miiejawĩ. Mũsã Jesucristore ẽjõpeotjãrã añurõ ma'isetisere werewĩ.

9 Tojo weerã Epafra mũsã ye quetire wéréca numũta maata Ƴsã Õ'acũrẽ sãrĩbosanu'cãwũ. A'tiro nicã quẽ'rãrẽ mũsãrẽ tojo sãrĩbosanu'cũcã'a. A'tiro sãrĩbosa'a: "Õ'acũ, Espiritu Santu tũ'omasĩse o'oato narẽ. Cũ tojo o'ocã, na mũ'ũ duti'quere añurõ tũ'omasĩrãsama.

10 Mũ'ũ yarã weronojõta weesetirãsama", ni sãrĩbosa'a. Õ'acũ mũsã tojo weecã ĩ'agũ, e'catigusami. Mũsã cũ Ƴ'caronojõta añurõ weerãsa'a. Cũrẽ masĩnemorãsa'a.

11 Cũ tutuayũ'ruagu cũ tutuasere mũsãrẽ o'ogusami. Tojo weecã, mũsã e'catise me'rã nipe'tise mejẽcã wa'asere wãcũtutuarãsa'a.

12 Mũsã Õ'acũrẽ e'catise o'orãsa'a. Cũ

musã ña'arõ wee'quere ðaporopu acobojo, ðucayutojacu niwĩ. Tojo weerã musã cũ tiropu ãpẽrã cũ yarã, cũrẽ ãjõpeorã me'rã nirãsa'a.

13-14 Marĩ pacu Ô'acũ marĩrẽ, wãtĩ dutino'cãrãrẽ yu'rũocu niwĩ. Ô'acũ macũ wẽrĩse me'rã na'itĩ'arõpu weronojõ ní'cãrãrẽ yu'rũocu niwĩ. Marĩ ña'ase wee'quere acobojocu niwĩ. Tojo weegu marĩrẽ cũ macũ uputu maigũrẽ o'óocu niwĩ. Marĩ wiogu niato ní'gũ tojo weecu niwĩ.

Ô'acũ Jesucristo wẽrĩse me'rã masãrẽ yu'rũo'que ni'i

15 Ô'acũrẽ ã'ano'ña marĩ'i. Cũ macũ a'ti nucũcãpu a'tigu, cũ nisetisere masãrẽ bajuy-oropu ã'ocu niwĩ. Jesucristo nipe'tise ðaporo nitojacu niwĩ.

16 Ô'acũ cũ macũ me'rã nipe'tisere u'muse, a'ti di'ta bajurã, bajutirãrẽ weecu niwĩ. Apeye quẽ'rãrẽ bajuse, bajutisere weecu niwĩ. Tojo nicã wiorãrẽ u'musepu nirã, a'ti nucũcãpu nirã, nipe'tirãrẽ weecu niwĩ. Tere wéégũ, "Yu'u macũ ye nirõsa'a", nicu niwĩ.

17 Cũ macũ ne waroputa nipe'tise cũ bajurẽse ðaporo nitojacu niwĩ. Cũ me'rãta cũ bajurẽ'que ninu'cũcã'a. Queoro ðucayuro marĩrõ ninu'cũ'u.

18 Jesucristo marĩ ðupoã cũrẽ ãjõpeorã wiogu nimi. Cũta marĩ cũrẽ ãjõpeorãrẽ catise o'ogu nimi. Marĩ nipe'tirã Jesucristore ãjõpeorã ni'cã curua, ni'cã upu ni'i. Cũ marĩ masã ma'mi nimi. Cũ wẽrĩca be'ro marĩ nipe'tirã ðaporo masãcu niwĩ. Tojo weegu nipe'tirã bu'ipu nimi.

19 Õ'acũ a'tiro nicu niwĩ: “Yu'u macũ yu'u weronojõta niato”, nicu niwĩ. Tojo weero nipe'tise Õ'acũ nisetise Jesucristopureta ni'i.

20 Õ'acũ cũ macũrẽ wẽrĩcã uacu niwĩ. Nipe'tise, nipe'tirã, u'muse, a'ti nucũcã yu'u me'rã apoato nígũ tojo weecu niwĩ. Cũ macũ curusapu wẽrĩse me'rã apocu niwĩ.

21 Musã quẽ'rã ne waro Õ'acũrẽ masĩticãrã niwũ. Musã ña'arõ weeseti'que bu'iri Õ'acũrẽ ã'atu'ti, ña'arõ wãcũcãrã niwũ.

22 Musã tojo nisetimicã, Õ'acũ ni'cãrõacãrẽ musã me'rã apocu niwĩ. Jesucristo marĩ weronojõ uputigu ti upu me'rãta cũ pi'eti, wẽrĩcu niwĩ. Cũ wẽrĩse me'rã Õ'acũ yarã bu'iri marĩrã tojacã weecu niwĩ. Cũ pacupure musãrẽ wiaguti nígũ, tojo weecu niwĩ.

23 Musã cũ ye quetire ãjõpeonu'cũcã, cũ uaro weenu'cũcã, tojo weegusami. Æpẽrã musãrẽ mejẽcã werecã, cũ ye quetire ne cõ'aticã'ña. A'tere nipe'tirocjãrãpu tu'orã weema. Yu'u quẽ'rã a'te quetire weretamusijaguta ni'i.

Õ'acũ Pablõre Jesucristõre ãjõpeorãrẽ weeta- muduti'que ni'i

24 Õ'acũ yu'ure wereduti'quere weregu, apetero pũrõ pi'eti'i. Tojo pi'etimigũ, e'cati'i. Jesucristo cãrẽ ãjõpeorã ye niatjere pi'etitojacu niwĩ. Tojo weegu yu'u quẽ'rã cãrẽ ãjõpeorãrẽ weetamusĩ'rĩgũ pi'eti'i.

25 Õ'acũ yu'ure narẽ weetamudutiwĩ. Tojo weegu yu'u musã Jesucristõre ãjõpeorãrẽ a'tiro

wee'e. Cũ ye quetire añurõ tu'omasĩpe'oato nígũ mäsãrẽ weetamu'u.

²⁶⁻²⁷ Mäsã Colosacjãrã, judío masã nitirã quẽ'rãrẽ añubutiase queti ni'i. Jesucristo mäsãpũreta nimi. Cũ mäsã me'rã niyucã, añuse mäsã u'mãsepũ niatjere masĩ, e'catiyutojasa'a. Õ'acũ maata judío masã nitirãrẽ Jesucristo yu'ruogusami nisere wereticũ niwĩ. Tojo weerã ne warocjãrãpũ a'tere masĩticãrã niwã. A'tocaterore Õ'acũ Jesucristore ëjõpeorãrẽ masĩcã weemi.

²⁸ Æsã Jesucristo ye quetire were'e. Nipe'tirã masãncũrẽ cũ nisetisere masĩdutarã were'e. Cũ uaro weedutirã, cũ me'rã ninu'cũdutarã were'e.

²⁹ A'tere weesĩ'rĩgũ, Jesucristo cũ tutuase o'ose me'rã yu'u masãrẽ upũtu bu'e, narẽ Õ'acũrẽ sãrĩbosa'a.

2

¹ Yu'u ní'caronojõta mäsã ye niatjere upũtu wãcũ, Õ'acũrẽ sãrĩbosa'a. Tojo weegu mäsãrẽ a'tere masĩato nígũ ojao'ogu wee'e. Nipe'tirã Laodiceacjãrãrẽ, tojo nicã yu'ure ï'atirãrẽ mejãrõta sãrĩbosa'a.

² A'tiro sãrĩ'i: "Õ'acũ, narẽ wãcũtutuase o'oya. Añurõ su'ori nisetiatio. A'merĩ ma'iatõ. Na añurõ mu'u ye cjasere tu'omasĩpe'oato. Na tojo wéerã, mu'u macũrẽ añurõ masĩrãsama", ni sãrĩbosa'a. Ne waropũre Õ'acũ nipe'tise cũ macũ Jesucristo ye cjasere wereticũ niwĩ. A'tocaterore majã cũ yere weremi.

³ A'tiro ni'i. Jesucristopũreta nipe'tise masĩse, tu'omasĩse ni'i. Tojo weegu cũ dia'cũ añurõ

masĩgũ nimi. Cũrẽ ějõpeorã nipe'tise masĩsere bocano'o.

⁴ Āpẽrã musãrẽ diacjũ weronojõ ucũmaasobosama. Añurõ tu'omasĩña nígũ, tere were'e.

⁵ Yũ'u aperopũ nimigũ, musã wa'teropũ nígũ weronojõ tu'oña'a. Musãrẽ pũrõ wãcũ'u. Yũ'u musã añurõ niseticã tu'ogũ, musã Jesucristore ějõpeocã tu'ogũ, upũtu e'cati'i.

⁶ Ne waropũre marĩ wiogũ Jesucristore ějõpeocãrã niwũ. Titapũre musã ějõpeo'caronojõta a'tiro nicã quẽ'rãrẽ nipe'tise nũmũrĩ cũrẽ ějõpeonu'cũcã'ña.

⁷ Cũrẽ nemorõ masĩnemoña. Musãrẽ bu'e'caronojõta cũrẽ ějõpeonemoña. Ɛmũcorinũcũ Ő'acũrẽ "Añu'u", ni e'catise o'oya.

Jesucristore ějõpeotirã ějõpeo'que ni'i

⁸ Āpẽrã musãrẽ werecã, añurõ tu'omasĩña. Na musãrẽ nisoose me'rã werebosama. Diacjũ weronojõ ucũsama. Niwe'e. Te ucũse me'rã masãrẽ were, maasoorã weema. Jesucristo ye mejẽta ni'i. Na basu na wãcũsere, duporocjãrãpũ nisetimujãti'quere wererã weema. Tojo weerã narẽ ějõpeoticã'ña.

⁹ A'tiro pe'e ni'i. Jesucristopũre nipe'tise Ő'acũ nisetise ni'i.

¹⁰ Musã quẽ'rã cãpũreta ni'i. Tojo weerã musã Ő'acũrẽ cuoyũ'ruatoja'a. Jesucristo nipe'tirã wiogũ nimi. Ɛ'mũsecjãrã, a'ti turicjãrã, bajurã, bajutirã nipe'tirã wiorã cũ doca nima.

¹¹ Musã masĩsa'a, Ő'acũ yarã sãjãsi'rĩrã, judío masã weronojõ õ'rẽcju yapa caserore

yejecō'aticārā niwũ. A'tiro pe'e wa'acaro niwũ. Jesucristo basu musā ña'arō weese-tisere cō'acũ niwĩ. Tojo weerā õ'rēcju yapa caserore yejecō'a'cārā weronojō Õ'acũ yarā to-jacārā niwũ.

¹² Jesucristo wērĩ yaano'cũ niwĩ. Musā quē'rā wāmeyeno'rā, ña'arō weeseti'quere du'urā, wērĩ yaano'cārā weronojō tojacārā niwũ. Wērĩ'cārā, catirā na wee'quere weetimimaba. Tojo weerā musā quē'rā toduporopũ wee'quere weetisa'a. Jesucristo wērĩca be'ro Õ'acũ cūrē masōcũ niwĩ. Cūrē masō'caronojōta musā quē'rārē masōgũ, apesu'tiro sājācā weecũ niwĩ. Õ'acũ cũ tutuaro me'rā cũ macũ Jesucristore masō'quere musā ējōpeoyucā, tojo weecũ niwĩ.

¹³ Musā judío masā nitirā õ'rēcju yapa caserore yejecō'aticārā niwũ. Tojo nicā ña'arō weecũcārā niwũ. Ña'arō nisetitjārā, toduporopũre wērĩ'cārā weronojō nicārā niwũ. A'tocaterore majā Õ'acũ yarā ni'i. Cũ musārē catinu'cũcā weecũ niwĩ. Musārē ña'arō wee'quere acobojocũ niwĩ.

¹⁴ Õ'acũ cũ duti'quere yũ'rũnũ'cācā, marĩrē bu'iri da'rebopĩ. Te marĩ peje ña'ase cũomi'quere cũ macũ curusapũ wērĩse me'rā acobojocũ niwĩ.

¹⁵ Jesucristo cũ wērĩse me'rā nipe'tirā ï'orōpũ wātĩarē docaque'acā weecũ niwĩ.

“A'ti nucũcā cjasere pũrō wācũticā'ña” ni'que ni'i

¹⁶ Musā masĩsa'a, judío masā ni'cārē ap-eye ba'asere ba'adutitisama. Tojo weerā

ãpērã musã sî'rîsere, ba'asetisere judío masãrê dutítisenøjõrê na ucjacã, tu'oticã'ña. Na peje bosenumãrî cõosama. Ni'cã cû'marê, ma'ma mujîpûrê, tojo nicã semanarîncû na soowãse numãrîrê cõosama. Na weronjõta ticuse bosenumãrî weedutisama. “Musã tojo weetirã, Õ'acû duti'quere weewe'e”, nisama. Na tojo nicã, tu'oticã'ña.

17 Õ'acû tere ne waropure Jesucristore queose o'oyugu weecu niwî. Yu'u macû ye cjasere masiãto nígû tojo weecu niwî. Ni'cãrõacãrê Jesucristo a'titojacu niwî. Tojo weegu masãrê a'tere toduporopu duti'quere Õ'acû sõ'owaro weedutitimi majã.

18 Æpērã musãrê a'tiro nisoobosama: “Ûsã añurã ni'i. Õ'acû ãsãrê añurõ wãcũato níã be'ti ñubue'e. Õ'acûrê wereco'terãrê ñubuepeo'o. Ûsã cãrîtimirã quẽ'ese weronjõ Õ'acû yere î'a'a. Tojo wéerã, ãsã ãpērã yu'ruoro Õ'acû ye cjasere añurõ masî'i. Musã quẽ'rã tojota weeya. Musã a'tere weetirã, bu'iri cõorãsa'a”, nibosama. Musãrê tojo nicã, ne ëjõpeoticã'ña. “Masîrã waro ni'i ãsã”, ni wãcũsama. Tojo nima'acãrã weema. A'te masã wãcũse dia'cû ni'i.

19 Na Jesucristore sirututima. Marî pûrîcã Jesucristo ya curuacjãrã ni'i. Cûta nimi marî dupoá. Marîrê cû masîsere, tutuasere o'osami. Te me'rã marî umucorinacû Õ'acû haronjõ nemorõ a'merî ma'i, weetamumasî'i.

20 Musãrê toduporopure musã ñecũsumua nisetimujãti'quere peje dutise nicaro niwã.

A'tocaterore todɔporopɔ weeseti'quere Jesucristo cǔ wērīse me'rǎ yu'rɔweticǎ weecu niwī. Yu'rɔwetica be'ro nimicǎ, ɔde'ro weerǎ mɔsǎ todɔporopɔ weeseti'caronojōta niti tja?

²¹ Mɔsǎrē āpērǎ “A'tenojōrē ñe'eticǎ'ña, tenojōrē ba'aticǎ'ña”, nibosama.

²² Na tojo nírǎ, a'ti turi cjase maata pe'tisere ucūrǎ weema. Masǎ na wǎcūrō me'rǎ weedutise ni'í.

²³ Na dutise añubutiase weronojō bɔsu'u. Bu'icjase dia'cǔ a'tiro nita'sasama: “Mɔsǎ quē'rǎ ǎsǎ weronojōta añurō ējōpeorɔa'a. Ō'acǔ marīrē añurō wǎcūato nírǎ be'tiroa'a. Marī upɔ quē'rǎ ña'a nisa'a. Tojo weerǎ marī basu marī upɔre pi'etise o'orɔa'a. Marī pi'etise o'óca be'ro marī ña'arō ɔaripejasere cō'ata basio'o”, nimisama. Niwe'e. Na dutisere wéérǎ, marī mejārōta tojacǎ'sa'a tja.

3

¹⁻³ Yu'u mɔsǎrē todɔporopɔ ní'caronojōta Jesucristo wērīcu niwī. Mɔsǎ cǔ wērīse me'rǎ todɔporopɔ weeseti'quere du'ucārǎ niwǎ. Cǔrē cǔ tutuase me'rǎ cǔ pacɔ masōcu niwī. Mɔsǎ quē'rǎrē cǔ macūrē ējōpeoyucǎ, cǔ tutuase me'rǎ mɔsǎrē catinu'cūcǎ weecu niwī. Tojo weerǎ a'ti turi cjasere wǎcūticǎ'ña. Ƴ'mɔse cjase pe'ere wǎcūña.

Mɔsǎ Ō'acǔpɔre Jesucristo me'rǎ ni'í. Jesucristo ɔ'mɔsepɔ Ō'acǔ me'rǎ wiogɔ dujiri cǔmurōpɔ nimi. Tojo weerǎ mɔsǎ Jesucristo nirō ɔ'mɔsepɔ cjasere añurō wǎcūnɔrǎña.

⁴ Cúta marĩrẽ su'ori nimi. Su'ori catimi. Marĩ cũ me'rã ni'i. Tojo weerã cũ a'ti nucũcãpũre apaturi a'ticã, marĩ quẽ'rã cũ tutuase, cũ asistese me'rã a'tirãsa'a.

Dũporopũ weeseti'quere Pablo du'uduti'que ni'i

⁵ Mũsã a'ti turi cjase ña'ase weesĩ'rĩsere du'ucã'ña. Mũsã, mũsã nũmoşãnumia nitirãrẽ a'metãrãticã'ña. Mũsã numia quẽ'rã, mũsã marãpusũmũa nitirãrẽ a'metãrãticã'ña. Ne ãpẽrã me'rã "Ña'arõ weesĩ'rĩsa'a", niticã'ña. Ne ãpẽrãrẽ mũsã wãcũsepũ "Narẽ wũacãjĩ, na me'rã nisĩ'rĩsa'a", ni wãcũticã'ña. ãpẽrã na cũosere uoticã'ña. Mũsã apeyenojõrẽ uorã, Õ'acũ mejẽtare ãjõpeorã weebosa'a.

⁶ Cũrẽ yũ'rũnũ'cãcã, a'tenojõ weerãrẽ Õ'acũ upũtũ bu'iri da'regũsami.

⁷ Mũsã todũporopũre tere weesetirã, ña'arã nicãrã niwũ.

⁸ A'tocaterore majã nipe'tisere mũsã ña'arõ weesere, uase, ĩ'atu'tise, ãpẽrãrẽ nitu'ti yabisere du'uya. Ña'asere ne wãcũ bujicã'ticã'ña.

⁹ ãpẽrãrẽ nisooticã'ña. Mũsã todũporopũ weeseti'quere du'utojacãrã niwũ. Tojo weerã tere weeticã'ña majã.

¹⁰ A'tocaterore mũsã apeye wãcũse cũo'o. Õ'acũ mũsãrẽ wee'cũ cũ weronojõ nisetiatio nĩgũ mũsãrẽ dũcayunu'cũgũ weemi. Nemorõ cũrẽ masĩatio nĩgũ tojo weemi.

¹¹ Marĩ nipe'tirãrẽ Jesucristo ĩ'orõpũre ne dũcawatise marĩ'i. Judío masã, judío masã nitirã, ãpẽrã õ'rẽcjũ yapa casero yejecõ'ano'cãrã,

yejecō'ano'ña marĩrãrẽ ducawatise marĩ'i. Tojo nicã apesecjãrãpũ, sumutoricjãrã, da'raco'teri masã, da'raco'tetiri masã, ã'rã nipe'tirã me'rã ducawatise marĩ'i. Cũ nipe'tirã cãrẽ ejõpeorã wioꝝ nimi. Nipe'tirãpũre nimi.

12 Õ'acũ m̄sãrẽ ma'imi. Cũ m̄sãrẽ cũ yarã niato níꝝ besecũ niwĩ. Tojo weerã ãpẽrãrẽ pajaña'ña. Narẽ añurõ e'catise me'rã weetamuña. M̄sã “Ãpẽrã yũ'rũoro ni'i”, ni wãcũticã'ña. M̄sãrẽ mejẽcã nicã, tojo tũ'oña'ña. Wãcũtutuaya.

13 M̄sã basu ãpẽrã me'rã a'metu'ti'cãrã, ãpẽrã mejẽcã weecã tũ'sati'quere narẽ acobojoya. Jesucristo m̄sãrẽ acobojocũ niwĩ. Tojo weerã m̄sã quẽ'rã ãpẽrãrẽ mejãrõta acobojoya.

14 A'merĩ ma'iña. M̄sã tojo ma'írã, nipe'tise yũ'ũ duti'quere weepe'ocã'rãsa'a. Añurõ m̄sã basu sũ'ori nisetirãsa'a.

15 Õ'acũ cũ ɰaro weecã, m̄sã ye ejeripõ'rãrĩpũre e'caticã weesami. Cũ ɰaro weetirã, bujawetisa'a. Tojo weerã cũ ɰaro weeya. Añurõ sũ'ori nisetiya. A'tere ɰasãꝝ, cũ m̄sãrẽ ni'cã curua, ni'cũ põ'rã weecũ niwĩ. M̄sã cãrẽ e'catise o'onu'cũcã'ña.

16 Jesucristo ye quetire añurõ wãcũnũrũña. Cũ masĩse o'ose me'rã ãpẽrãrẽ m̄sã basu a'merĩ bu'eya. M̄sã ejeripõ'rãrĩpũ Õ'acũrẽ e'catise o'orã, basapeoya.

17 M̄sã Jesucristo yarã ni'i. Tojo weerã nipe'tise m̄sã weesetise, ucũsetisere cũ yarã weronojõta weeya. Jesucristo cũ tutuase me'rã tere weeta basio'o. Cũ pacũre e'catise o'onu'cũcã'ña.

Jesucristore ějōpeorãrē weeduti'que ni'i

¹⁸ Marãp̄tirãnumia, Jesucristo marĩ wioġure ějōpeorã, a'tiro weeya. Musã marãp̄sumuarē na dutisere yu'ti ějōpeoya.

¹⁹ Musã numotirãumua pe'e, musã numosãnumiarē ma'iña. Na me'rã uaticã'ña.

²⁰ Wĩ'marã, ma'mapjia, nipe'tise musã pacusumua dutisere añurō yu'tiya. Ō'acũ tojo weecã uasami.

²¹ Musã pō'rãrē na'irō tu'ti, uacã weeticã'ña. Musã tojo weecã, na bujaweti, musã dutisere weemasītisama.

²² Da'raco'teri masã, nipe'tise musã wiorã a'ti nucũcãcjãrã na dutisere yu'tiya. Na ĩ'orōp̄ure, na ĩ'atirop̄ure añurō da'raya. Musã wiorã ĩ'orōp̄u dia'cũ añurō da'rarã, musã wioġu "Añurō da'rama" ni wãcũato, nirã weebosa'a. Musã tojo weeticã'ña. Ō'acũrē añurō ějōpeotjãrã, weesooro marĩrō da'raya.

²³ Musã apeyenojō da'rarã, añurō tu'sase me'rã da'raya. Teese me'rã weeticã'ña. Masãrē da'rabosamirã, Jesucristore da'rabosarã weronojō tu'oña'ña.

²⁴ Musã cũrē da'raco'terã ni'i. Cũta musãrē u'musepu wapayegusami. Musã tere masitoja'a. Tojo weerã añurō da'raya.

²⁵ Ña'arō wee'que wapare Ō'acũ bu'iri da'regusami. Masã nipe'tirãrē ni'cãrōnojō bu'iri da'resami. Ne ni'cũ yu'rãwetisami.

4

¹ Dutiri masã, musã quẽ'rã u'musepure ni'cũ wioġu cuo'o. Musã tere masitoja'a. Tojo weerã

Õ'acũ ɰaronojõta mʉsãrẽ da'raco'terãrẽ añurõ cɰoya.

² Õ'acũrẽ añurõ tɰ'ocasanɰ'cõtjãrã, sẽrĩnu'cũcã'ña. Cũrẽ “Añu'u”, ni e'catise o'oya.

³ Mʉsã Õ'acũrẽ sẽrĩrã, ʉsã quẽ'rãrẽ sẽrĩbosaya. “Pãjãrã Jesucristo ye quetire masĩtirãrẽ tɰ'osĩ'rĩcã weeato”, ni sẽrĩbosaya. Cũ ye queti dɰporocjãrãɰ na masĩno'ña marĩ'que añuse queti ni'i. A'te werese ye bu'irita yɰ'u bu'iri da'reri wi'ipɰ dujisa'a.

⁴ Yɰ'ure Õ'acũrẽ sẽrĩbosaya. Yɰ'ure “Wisiro marĩrõ diacjũ wereato”, ni sẽrĩbosaya.

⁵ Æpẽrã Jesucristore ẽjõpeotirã me'rã añurõ nisetiya. Na me'rã mʉsã weesetisetirinacũ Õ'acũ ɰaronojõta narẽ añurõ weeya.

⁶ Na me'rã ucũrã, añurõ tɰ'saropɰta tɰ'otɰ'sase me'rã ucũña. Æpẽrã mʉsãrẽ sẽrĩtiña'cã, añurõ diacjũ yɰ'tiya.

Pablo me'rãcjãrã añudutise o'o'que ni'i

⁷ Tíquico yɰ'u me'rãcjũ yɰ'u ma'igũ a'tiro weegʉsami. Yé quetire mʉsãrẽ weregɰ wa'agʉsami. Cũ yɰ'u me'rã marĩ wiogu Jesucristo yere da'raco'tetamugũ nimi. Tojo nicã yɰ'ure bu'etamugũ nimi.

⁸ Yɰ'u cãrẽ mʉsã tiropɰ wa'adutigati wee'e. ʉsã ye quetire tɰ'orã, mʉsã wãcũtutua, e'catinemorãsa'a.

⁹ Onésimo mʉsã ya macã nícũ'cɰ quẽ'rã cũ me'rã wa'agʉsami. Cũ yɰ'u ma'igũ, yɰ'u me'rãcjũ a'tocaterore ʉsãrẽ añurõ weetamugũ weemi. Na pɰarã mʉsãrẽ wererãsama nipe'tise a'to Romãɰ de'ro wa'a'quere.

¹⁰ Aristarco mʉsārē añudutimi. Cũ quē'rā yu'u me'rā bu'iri da'reri wi'ipʉ nimi. Marco, Bernabé basucʉ quē'rā mʉsārē añudutimi. Marco mʉsā tiropʉ sijacā, yu'u mʉsārē todʉporo ní'caronojōta añurō ñe'eapa.

¹¹ Apĩ Jesú na “Justo” pisuno'gũ mʉsārē añudutimi. Ā'rā i'tiarā āpērā judío masā Jesucristore ējōpeorā wa'terore na dia'cũ yu'ure da'ratauma. Na Ō'acũ wioḡʉ nisere masārē bu'erā weema. Na weetamuse me'rā yu'u wācūtutua, e'catise cʉo'o.

¹² Epafras mʉsā me'rācjũ añudutimi. Cũ Jesucristo ye cjasere da'raco'tegʉ nimi. Cũ mʉsārē ʉpʉtʉ sērībosagʉ weemi. Ō'acūrē añurō sirutuato, cũ ʉaro añurō weenu'cũato níḡũ, tojo sērībosami.

¹³ Yu'u diacjũta were'e. Cũ mʉsārē ʉpʉtʉ sērībosacā ĩ'a'a. Āpērā quē'rārē Laodiceacjārārē, tojo nicā Hierápolícjārārē sērībosami.

¹⁴ Luca ocoyeri masũ ũsā ʉpʉtʉ ma'igũ mʉsārē añudutimi. Apĩ quē'rā Demas wāmetigʉ añudutise o'omi.

Pablo añudutitʉo'que ni'i

¹⁵ Laodiceacjārā Jesucristore ējōpeorā añuato. Ninfa wāmetigo quē'rā añuato. Tojo nicā nipe'tirā co ya wi'ipʉ Ō'acūrē ējōpeorā nerēwuarā añuato.

¹⁶ Mʉsā a'ti pūrīrē bu'epe'oca be'ro Laodiceacjārāpʉre o'óya. Na quē'rā na nerēwuaropʉ bu'eĩ'oato. Mʉsā quē'rā ape pūrī

Laodiceacjārārẽ yu'u ojáca pūrĩrẽ ñe'erã, m̄sã nerẽrõp̄u bu'eya.

¹⁷ A'tiro niña Arquipore: “Marĩ wioḡu da'radutiḡu cūu'quere añurõ da'ratu'ajaya.”

¹⁸ A'te nit̄ose darire m̄sārẽ añudutise o'oḡu, yu'u basuta oja'a. Wãcũña yu'u bu'iri da'reri wi'ip̄u nisere. Õ'acũrẽ s̄rĩbosaya. Õ'acũ m̄sārẽ añurõ weeato.

Tocã'rõta oja'a.

Pablo

**Õ'âkã hi yeere uúkũri turi Tukano
New Testament in Tucano (BR:tuo:Tucano)**

copyright © 2009 Wycliffe Bible Translators, Inc.

Language: Tucano

Translation by: Wycliffe Bible Translators, Inc.

Tucano [tuo], Brazil

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Tucano

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-12-01

PDF generated using Haiola and XeLaTeX on 18 Apr 2025 from source
files dated 31 Aug 2023

00ebd04f-7b0d-5a72-9407-eb53ae2bd086